

শব্দালঙ্কার

আমাদের কাব্যশাস্ত্রকারগণ কাব্যের দুটি প্রকারভেদ নির্দেশ করেছেন দুটি বিশেষণের সাহায্যে—দৃশ্য আর শ্রব্য। দৃশ্য কাব্য নাটক; শ্রব্য কাব্য রামায়ণ মেঘদূত মেঘনাদবধ সোনার তরী। শ্রব্যত্বই যে কাব্যের প্রধান বৈশিষ্ট্য আধুনিক ইউরোপীয় কাব্যরসিকগণও তা স্বীকার করেন। খ্যাতিমান কবিসমালোচক Alfred Noyes বলছেন, “...it (The Poetry Society of London) has been rendering a great service to the cause of poetry for many years now. It has helped people to realize that *poetry was meant to be heard*” (The Poetry Review, March-April, 1933)।

কাব্য রসাত্মক বাক্য। বাক্য পূর্ণ ভাবের প্রকাশক পদসমূহ। বাক্যকে যদি পরিবার বলি, পদকে বলতে হয় তার পরিজন। বহু বাক্য নিয়েও যেমন কবিতা হয়, একটিমাত্র বাক্যেও তেমনি নিটোল একখানি রসোসৌর্গ কবিতার সৃষ্টি হ’তে পারে। শেষোক্ত লক্ষণের অজস্র কবিতা রয়েছে সংস্কৃতে এবং প্রাকৃত্তে; বাঙলাতেও রয়েছে এর অনেকগুলি নিদর্শন রবীন্দ্রনাথের ‘লেখন’ আর ‘ফুলিঙ্গ’ কাব্যে।

বাক্যপরিবারের পরিজন যে পদ, তার দুটি রূপ—একটি বর্ণময় দেহরূপ, অন্যটি অর্থময় চিদ-রূপ। প্রথমটির আবেদন আমাদের ইন্দ্রিয়ের কাছে, দ্বিতীয়টির বোধের কাছে—একটি concrete, অপরটি abstract।

দেহরূপটিকে কান দিয়ে দেখাই সার্থক দেখা—ধ্বনির (sound) মধ্যে যে রূপের আলো থাকে তার দ্রষ্টা চোখ নয়, মন। কবি ‘ছন্দে ছন্দে সুন্দর গতি’ দান করেন এই ধ্বনিকে, প্রসাধনে মগ্নিত করেন এই ধ্বনিকে।

শব্দালঙ্কার প্রকৃতপক্ষে ধ্বনির অলঙ্কার। ধ্বনি আবার বর্ণধ্বনি, পদধ্বনি, কোথাও বা বাক্যধ্বনি। শব্দালঙ্কারের শব্দ, সূক্ষ্ম বিচারে, word নয়। বর্ণধ্বনি অল্পপ্রাসে, পদধ্বনি যমক বক্রোক্তি শ্লেষ পুনরুক্তবদাভাসে, বাক্যধ্বনি সর্কযমকে। যথাস্থানে এদের ব্যাখ্যা করব এবং বাঙলাভাষার অন্তঃপ্রকৃতির দিকে দৃষ্টি রেখে এদের নানানতর প্রকারভেদ যুক্তি দিয়ে যথাযোগ্যভাবে গ্রহণ বা বর্জন করব।

কেউ হয়তো বলবেন, ‘শব্দ’ মানে ধ্বনি শুধু অনুপ্রাস-সম্পর্কেই বলা চলে ; যমক শ্লেষ ইত্যাদির বেলায় শব্দ মানে word বলব না কেন ?

বলতে আমিও তো নিষেধ করি নাই। শব্দ মানে word না ধরলে ‘পদধ্বনি’ ‘বাক্যধ্বনি’ লেখা তো আমার পক্ষে সম্ভব হ’ত না। যমক শ্লেষ ইত্যাদিতে অর্থেরও চরম মর্যাদা—অর্থ বাদ দিলে এসব অলঙ্কারের অস্তিত্বই থাকবে না, শুধু অনুপ্রাসই থাকবে একমাত্র শব্দালঙ্কার হ’য়ে। তবু এরা অর্থালঙ্কারের পর্যায়ভুক্ত হয় নাই কেন ? এই প্রশ্নের উত্তরেই আমার বক্তব্য পরিস্ফুট হ’য়ে যাবে। অর্থালঙ্কারে শব্দের (word-এর) অর্থটাই সর্বস্ব ; শব্দালঙ্কারে অর্থের দিকটা নিতান্তই গৌণ। শব্দ এখানে word সত্য ; কিন্তু শব্দের বিশেষবর্ণসমাবেশময় গঠনরূপটাই চরম সত্য। এই গঠনরূপে বর্ণাবলীর মিলিত যে ধ্বনি (sound), সেইটিই অলঙ্কারের নিয়ন্তা। দুটো উদাহরণ দেওয়া যাক—

মধুসূদনের

“কেন গর্জী কর্ণে তুমি কর্ণ-দান কর,
রাজেশ্বর ?”

প্রেমেশ্বরের

“কোন্ সে বধূর বৃকের আগুন ভিতর করিয়া থাক,
অবশেষে লাগে বসনে তাহার পুড়ে গেল সাতপাক।”

প্রথমটিতে ‘কর্ণ’ ‘কর্ণ’—অলঙ্কার যমক। ‘সেনাপতি কর্ণ’ আর ‘কান’ এদের যথাক্রমিক অর্থ (অহঙ্কারী কর্ণের কথা শোন কেন ?)। প্রথম ‘কর্ণ’-কে ‘সূতপুত্র’ অথবা দ্বিতীয় ‘কর্ণ’-কে ‘কান’ বা ‘শ্রুতি’ করলে আর যমক থাকে না। অলঙ্কার রাখতে হ’লে ‘কর্ণ-কর্ণ’ রাখতেই হবে। অর্থের সঙ্গে যেটি চাই-ই চাই সেটি হচ্ছে ‘কর্ণ’ বর্ণকয়টির ধ্বনির যথায়থ দ্বিরাবৃত্তি। প্রেমেশ্বরের কবিতাংশটিতে ‘সাতপাক’ কথাটিতে শ্লেষ অলঙ্কার। এটি word তো নিশ্চয়ই ; কিন্তু এর অর্থ বজায় রেখে একে যদি সাতপাঁচ, সপ্তবেষ্টনী-গোছের চেহারা দেওয়া যায় তাহ’লে শাড়ীর সাতটা পাক ঠিকই থাকবে, কিন্তু বিবাহ অর্থটা অন্তর্ধান করবে এবং শ্লেষ অলঙ্কার বরণ করবে অপমৃত্যু। মূল্য তাহ’লে কোন্টার বেশী হ’ল ?—অর্থের ? না, বিশেষধ্বনিমান্ সাত-পা-ক বর্ণাবলীর ?

শব্দালঙ্কার শব্দপরিবর্তন সহজে পারে না, অর্থালঙ্কার পারে। এইখানেই ছইয়ের পার্থক্য (‘অর্থালঙ্কার’ দ্রষ্টব্য)।

শকালঙ্কারের মধ্যে অনুপ্রাস, যমক, বক্রোক্তি, (শব্দ-) শ্লেষ এবং পুনরুক্তবদান্তাসই প্রধান। আধুনিক বাঙলা সাহিত্যেও অনুপ্রাসের প্রয়োগ সবচেয়ে বেশী ; এর নীচেই বক্রোক্তি আর শ্লেষ ; তৃতীয় স্থান যমকের এবং চতুর্থ পুনরুক্তবদান্তাসের।

আগেই বলেছি শব্দপরিবর্তনে শকালঙ্কারের অস্তিত্ব থাকে না।

১। অনুপ্রাস

একই বর্ণ বা বর্ণগুচ্ছ, যুক্তভাবেই হোক আর বিযুক্তভাবেই হোক, একাধিক-বার ধ্বনিত হ'লে হয় অনুপ্রাস।

বর্ণ = ব্যঞ্জনবর্ণ, স্বরবর্ণ নয়। যে বর্ণের বা বর্ণগুচ্ছের অনুপ্রাস হবে, তাদের সঙ্গে মিলিত স্বরধ্বনি বিষম অর্থাৎ বিভিন্ন হ'লেও অনুপ্রাস অক্ষুণ্ণ থাকবে (“অনুপ্রাসঃ শব্দসাম্যং বৈষম্যেহপি স্বরশ্চ যৎ”—সাহিত্যদর্পণ)। ‘শব্দসাম্য’ কথাটার অর্থ ব্যঞ্জনবর্ণের ধ্বনিসাম্য। অনুপ্রাসে স্বরধ্বনির সম্মান নাই। দুইএকটা উদাহরণ বিশ্লেষণ ক'রে দেখালেই ব্যাপারটা পরিষ্কার হ'য়ে যাবে :

(i) “গুরু গুরু মেঘ গুমরি গুমরি

গরজে গগনে গগনে

গরজে গগনে।”—রবীন্দ্রনাথ।

—প্রথম পঙ্ক্তিতে ‘গ’ অনুপ্রাসিত হয়েছে চারবার এবং প্রত্যেক বারেই ‘গ’-র সঙ্গে মিলিত হ'য়ে আছে ‘উ’-ধ্বনি ; স্তত্রাং ব্যঞ্জনের সঙ্গে স্বরধ্বনিরও ঘটেছে সমতা। পরবর্তী পঙ্ক্তিদুটিতেও এই অবস্থা : ‘গ’ অনুপ্রাসিত হয়েছে আটবার এবং প্রত্যেক বারেই ‘গ’-র সঙ্গে মিলিত হ'য়ে আছে ‘অ’-ধ্বনি ; স্তত্রাং স্বর ও ব্যঞ্জন দুইয়েরই ধ্বনিসাম্য। আবার সমগ্রভাবে তিনটি পঙ্ক্তিতে ‘গ’ অনুপ্রাসিত হয়েছে বারোবার। প্রথম পঙ্ক্তিতে স্বরধ্বনি ‘উ’, দ্বিতীয়-তৃতীয়ে ‘অ’ ; স্তত্রাং স্বরধ্বনি বিষম। ব্যঞ্জনধ্বনির সঙ্গে মিলিত স্বরধ্বনির সাম্য হ'ল কি বৈষম্য হ'ল সেদিকে দৃষ্টি দেওয়ার কোনো প্রয়োজন নাই। উদ্ধৃতিটির অলঙ্কারনির্ণয়ে শুধু এই কথাটি বলতে হবে যে এখানে ‘গ’-ধ্বনির অনুপ্রাস, ধ্বনিটি বারোবার আবৃত্ত হ'য়েছে।

(ii) “কুলায়ে কাপিছে কাতর কপোত”—রবীন্দ্রনাথ।

—চারবার আবৃত্ত ‘ক’-ধ্বনির অনুপ্রাস।

(iii) 'স্বর্ণোজ্জ্বলবর্ণী, তোমার কর্ণে ছলিছে কর্ণিকার'—শ. চ.

—'র্ণো', 'র্ণা', 'র্ণে', 'র্ণি'; কিন্তু তাতে কি হয়েছে? আমাদের অলঙ্কার চারবার আবৃত্ত 'র্ণ' এই যুক্তব্যঞ্জনধ্বনির অনুপ্রাস।

অনুপ্রাসে ব্যঞ্জনের সঙ্গে মিলিত স্বরধ্বনির সাম্যকে ইংরিজিতেও মূল্য দেওয়া হয় না।

শুদ্ধ স্বরধ্বনির সাদৃশ্যকে আমরা অনুপ্রাস বলি না, কারণ এক স্বর বার বার উচ্চারিত হ'লেও ধ্বনিগত বৈচিত্র্য সৃষ্টি করতে পারে না—“স্বরমাত্রসাদৃশ্যং তু বৈচিত্র্যাত্বাবাৎ ন গণিতম্” (বিশ্বনাথ)। এ যুক্তি বিজ্ঞানসম্মত। ইংরিজিতে ভুল ক'রে স্বরবর্ণের অনুপ্রাস (Alliteration) বহুদিন ধ'রে স্বীকৃত হ'য়ে এসেছিল। আজও উদাহরণরূপে

“Apt Alliteration's artful aid” বা

“An Austrian army awfully arrayed”

অনেকের বইয়ে দেখা যায়। অথচ ধ্বনির দিক থেকে 'a' কত বিসদৃশ—'a' = এ্যা, আ, এ, অ। এর চেয়ে শতগুণে ভালো

'আকুল আবেগে আমি আপনার আসার আশায় আছি'—শ. চ.

ধ্বনির দিক থেকে এটি নিখুঁত। তবু 'আ'-র অনুপ্রাস হয়েছে একথা বলব না। আধুনিক ইংরিজি কাব্যশাস্ত্রে স্বরের alliteration স্বীকার করা হয় না, হয় শুধু ব্যঞ্জনের—“Alliteration occurs when two or more syllables in close proximity commence with the same consonant”, বলেছেন Smith।

একটা মূল্যবান প্রসঙ্গ :

একই স্বরধ্বনির বহুবার আবৃত্তি ক্ষেত্রবিশেষে অপূর্ণ ইঙ্গিতাল বিস্তার করে Onomatopœia বা 'ভাবধ্বনি'তে। কিন্তু Onomatopœia অনুপ্রাস নয়। এটিকে Figure-এর বা অলঙ্কারের পর্যায়ভুক্ত করা ভুল, কারণ এর কোনো বাঁধা পথ নাই। একটা উদাহরণ দিই :

“স্তম্ভ প্রাসাদ বিষাদ-আধার,

শ্মশান হইতে আসে হাহাকার—

রাজপুরবধু যত অনাথার

মর্মবিদার রব।”—রবীন্দ্রনাথ।

এখানে দীর্ঘায়ত 'আ'-ধ্বনি বার বার আবৃত্ত হ'য়ে করেছে বেদনার অপূর্ণ ব্যঞ্জনা। কিন্তু এই ব্যঞ্জনারহস্য শুধু নিরাকার 'আ'-ধ্বনির মধ্যেই নিহিত নয়।

বারংবার আবৃত্ত সাকার 'শষস'-ব্যঞ্জনধ্বনির শ্বাসব্যঞ্জনাতে আর শোকপ্রকাশ-
স্ফোটক দ্বিরাবৃত্ত 'হ'-ধ্বনিকে সাহায্য করার সৌভাগ্য লাভ করেছে বলেই
'আ'-ধ্বনির অপূর্ণ ব্যঞ্জনা সম্ভবপর হয়েছে। একা 'আ'-ধ্বনি যে কত ব্যর্থ তা
বোঝা যাবে যদি 'শষস' আর 'হহ' উড়িয়ে দিই :

‘মুক রাজাগারে বেদনা-তিমির,
চিতাভূমে জাগা আনিছে সমীর
কত না অনাথা পুরকামিনীর

মর্ষবিদারী রব।’—শ. চ.

এখানেও তেরোটি আ-ধ্বনি রয়েছে, কিন্তু একান্ত মূল্যহীন এরা—না আছে
অনুপ্রাস, না আছে Onomatopœia।

কেউ কেউ রবীন্দ্রনাথের

“ঐ আসে ঐ অতিভৈরব হরষে
জলসিক্ত ক্ষিতিসৌরভরভসে
ঘনগৌরবে নবযৌবনা বরষা”

নজিররূপে দাঁড় করিয়ে বলেন, এই তো চমৎকার অনুপ্রাস সৃষ্টি করেছে ‘ঐ’,
‘ঔ’ ; তাহলে মানি কেমন ক’রে যে স্বরধ্বনিতে অনুপ্রাস হয় না ?

আমার উত্তর এই :

বাঙলায় স্বরধ্বনির উচ্চারণে হ্রস্বদীর্ঘবিচার নাই ; সব স্বরই হ্রস্ব অর্থাৎ
একমাত্রার। শুধু মাত্রাচ্ছন্দের কবিতায় ‘ঐ’ আর ‘ঔ’ এই দুটিমাত্র স্বর দীর্ঘ
বা দ্বিমাত্রিকভাবে উচ্চারিত হয়। এরা ‘আ, ঈ, উ, এ, ও’-র চেয়ে ওজনে
ভারী, তার কারণ উচ্চারণে এরা দুই স্বরধ্বনির (মিলিত নয়) স্বল্পব্যবহিত রূপ
—‘ঐ’=অই বা ওই, ‘ঔ’=অউ বা ওউ। স্বরবর্ণাবলীর মধ্যে এরা এইভাবে
একটু ব্যক্তিত্ববিশিষ্ট বলে একপ্রকার বিশেষ ধ্বনিমূল্য এদের আছে।

মাত্রাচ্ছন্দেই রবীন্দ্রনাথ এখানে প্রয়োগ করেছেন ‘ঐ’ ‘ঔ’। এদের সঙ্গে
যুক্ত করেছেন বহু গুরুগম্ভীর ব্যঞ্জনধ্বনি—ভ, হ, জ, ঘ, গ, ব, য ; সঙ্গে সঙ্গে
সৃষ্টি করেছেন ‘ভ, জ, য, ত, র, ষ, স, ন’-র অনুপ্রাস। মেঘমেহুর বর্ষার
ভাবব্যঞ্জনায় রচিত বহুবিচিত্র উপচার-উপকরণের নৈবেদ্যখানির অঙ্গীভূত
হওয়ায় ‘ঐ’ আর ‘ঔ’ পাঠকমনে বিস্তার করে একপ্রকার মায়া—মাত্রাচ্ছন্দ ওই
মায়াসৃষ্টির অবকাশ ঘটিয়েছে।

এই কবিতাংশটিকে তানপ্রধান পয়ারে রূপান্তরিত ক’রে দেখিয়ে দিচ্ছি

‘ঐ’ ‘ঔ’ একমাত্রিক হওয়ায় ধ্বনিগৌরব হারিয়ে কত গৌণভূমিতে নেমে এসেছে :

‘ঐ আসে ঐ যে গো অতিভৈরব হরষে
সলিলসিঞ্চিত ক্ষিতিসৌরভরভসে
জলদগৌরবে নবযৌবনা বরষা’—শ. চ.

এখানে **অনুপ্রাস হয় নাই** ; কারণ যে ধ্বনিবৈচিত্র্য থাকলে কান সুন্দর ব’লে তাকে বরণ ক’রে নেয়, ‘ঐ’ ‘ঔ’ এখানে মেরুদণ্ডহীন ব’লে সেই বৈচিত্র্য সৃষ্টি করতে পারে নাই।

মনে হোয়, রবীন্দ্রনাথ ‘বর্ষামঙ্গল’ কবিতায় ‘ঐ’ লিখেছিলেন ‘ঐ’কারের সম্ভাব্য অনুপ্রাসনার প্রতি পাঠকের দৃষ্টি-আকর্ষণের বাসনায়। মনে হওয়ার কারণ ‘ঔই’ লেখাই রবীন্দ্রনাথের অভ্যাস, সবরকম ছন্দে।

যাই হোক, আমরা মাত্রাচ্ছন্দের কবিতায় ‘ঐ’ আর ‘ঔ’ স্বরধ্বনি-ছুটির অনুপ্রাস স্বীকার করব। রবীন্দ্রনাথের কবিতাংশটির মতন অল্পকূল ধ্বনিপরিবেশ না থাকলেও ‘ঐ’ ‘ঔ’ আপন শক্তিতেই অনেকটা বৈচিত্র্য যে আনতে পারে তার প্রমাণ মিলবে নীচের কবিতাটিতে :

‘ঐ ধেনু ল’য়ে হৈ হৈ রব করিয়া
পৌষের সাঝে মোবনপথ ধরিয়া
রাখাল ফিরিছে, বৌ আসে জল ভরিয়া।’—শ. চ.

বাঙলা উচ্চারণ ও অনুপ্রাস

বাঙলাভাষার উচ্চারণবৈশিষ্ট্যের কারণে আমাদের অনুপ্রাসবিচার ঠিক সংস্কৃতনিয়মে চলে না। আমরা মুখে বলি বর্গীয় ‘ব’ অন্তঃস্থ ‘ব’, বর্গীয় ‘জ’ অন্তঃস্থ ‘য’, দন্ত্য ‘ন’ মূর্দ্ধন্ত ‘ণ’, তালব্য ‘শ’ মূর্দ্ধন্ত ‘ষ’ দন্ত্য ‘স’ ; কিন্তু উচ্চারণে আমাদের সকল ‘জ’ই বর্গীয় (জল, যদি), সকল ‘ব’ই বর্গীয় (বন্ধন, বচন), সকল ‘ন’ই দন্ত্য (ধন্য, গণ্য), সকল ‘শ’ই তালব্য (বিশেষণে **সবিশেষ**)। ‘য’-কে ‘জ’ করেছি ; কিন্তু ‘য’-র মূল সংস্কৃত উচ্চারণ বাঙলায় যেখানে রাখতে হয়েছে, সেখানে এর তলায় ফুটকি দিয়ে নতুন এক বর্ণ সৃষ্টি করেছি—নয়ন, প্রিয়। এইসব কারণে আমাদের অনুপ্রাসকে অনেকক্ষেত্রে চলতে হবে অ-সংস্কৃত অর্থাৎ খাঁটি বাঙলা পদ্ধতিতে।

ছইএকটা উদাহরণ দিই :

(i) ‘হুঃশাসনের শোষণ-নাশন হে ভীষণ-দরশন’—শ. চ.

(ii) 'নববন্ধনে বাঁধিলে যে তুমি জননি'—শ. চ.

—(i) **বাঙলামতে** 'শ ষ স' সবই উচ্চারণে 'শ' (sh) এবং 'ণ ন' উচ্চারণে 'ন' (n) ব'লে সাতবার 'শ'-ধ্বনির এবং ছবার 'ন'-ধ্বনির অনুপ্রাস। **সংস্কৃতমতে** এ উদাহরণে অনুপ্রাস-বিচার চলে **দুভাবে**: (১) উচ্চারণস্থান বিভিন্ন ব'লে 'শ ষ স' অথবা 'ণ ন' অনুপ্রাসের অধিকারে বঞ্চিত; বলতে হবে—চারবার 'শ', ছবার 'ষ', ছবার 'ণ' আর চারবার 'ন' অনুপ্রাসিত হয়েছে, 'স' প'ড়ে আছে একলা। (২) 'স ন' অনুপ্রাস উচ্চারণস্থান দস্ত ব'লে, 'ষ ণ' অনুপ্রাস উচ্চারণস্থান মূর্দ্ধা ব'লে—এর নাম 'শ্রুত্যানুপ্রাস'।

(ii) **বাঙলামতে** ছবার 'ব'-ধ্বনির অনুপ্রাস। **সংস্কৃতমতে** অনুপ্রাস নাই, কারণ 'নব'-র 'ব' অস্তঃস্থ, 'বন্ধনে'-র 'ব' বর্গীয়। **বাঙলামতে** 'জ য' অনুপ্রাস আমাদের উচ্চারণে এরা এক (j) ব'লে। **সংস্কৃতমতেও** অনুপ্রাস 'জ য' একই স্থান (তালু) থেকে উচ্চারিত ব'লে—শ্রুত্যানুপ্রাস।

'অলঙ্কার-চঞ্জিকা'-র প্রথম সংস্করণে শ্রুত্যানুপ্রাস কেন বর্জন করেছিলাম সংক্ষেপে তা একটু জানিয়ে দেওয়ার দরকার হয়েছে।

যে-সব ব্যঞ্জন একই স্থান থেকে উচ্চারিত তাদের মধ্যে সূক্ষ্ম একপ্রকার ধ্বনিসাম্য অনুভূত হয়। এই সূক্ষ্ম সাদৃশ্য-অনুভূতির ভিত্তিতে এইজাতীয় বর্ণধ্বনির অনুপ্রাস প্রাচীনদের কেউ কেউ স্বীকার করেছিলেন। এরই নাম শ্রুত্যানুপ্রাস; আচার্য্য দণ্ডী এর প্রবর্তক, ভোজরাজ উৎসাহী সমর্থক, বিশ্বনাথ অদ্ভুত অনুবর্তক—'অদ্ভুত' বললাম এই কারণে যে বিশ্বনাথ প্রাচীন ধারা থেকে স'রে এসে আমার অর্থাৎ বাঙালীর প্রায় পাশে দাঁড়িয়েছেন। আচার্য্য দণ্ডীর উদাহরণ "এষ রাজা যদা লক্ষ্মীম্..."—তঁার মতে 'ষ-র', 'জ-য', 'দ-ল' প্রত্যেক জোড়াটিতে শ্রুত্যানুপ্রাস; কারণ প্রথম জোড়াটির উচ্চারণস্থান মূর্দ্ধা, দ্বিতীয়টির তালু এবং তৃতীয়টির দস্ত। আমরা কিন্তু একমাত্র 'জ-য' ছাড়া অন্য কোনো জোড়ায় বর্ণে বর্ণে ধ্বনিসাম্য শ্রুতি (কান) দিয়ে ধরতে পারি না। বিশ্বনাথেরও আমাদেরই মতন অবস্থা হয়েছে। তঁার উদাহরণ "মনসিজং জীবয়ন্তি দৃশৈব যাঃ"—তিনি বলছেন 'জ-য' শ্রুত্যানুপ্রাস; কিন্তু 'মনসিজ' কথাটিতে দস্ত হ'তে উচ্চারিত 'ন-স'-সম্বন্ধে তিনি নীরব। এর একমাত্র কারণ এই যে বাঙলার মতন ওড়িয়াতেও 'য' উচ্চারণে 'জ' ব'লে বিশ্বনাথের কান সহজেই এদের ধ্বনিসাম্য মেনে নিয়েছে, 'ন-স'-কে সমধ্বনি ব'লে স্বীকার করতে পারে নাই।

এ অবস্থায় শ্রুত্যানুপ্রাসকে বাঙলায় প্রাচীন সংজ্ঞা-অনুসারে গ্রহণ করার কোনো সার্থকতা দেখি না।

বাঙলা কবিতায় অন্ত্যানুপ্রাস একটি মূল্যবান শব্দালঙ্কার। সেখানে শ্রুত্যানুপ্রাস আমাদের উপকার করবে; কিন্তু তার সংজ্ঞা রচনা করব নতুন ক'রে।

বাঙলায় অনুপ্রাস তিনরকম—অন্ত্য, বৃত্তি, ছেক। এদের মধ্যে বৃত্তিই শ্রেষ্ঠ, কারণ গুণপঞ্চময় সাহিত্যে এর সার্বভৌম অধিকার; মিত্রছন্দা কবিতার আনন্দলোকে 'চরণ-বিচরণ' অন্ত্যানুপ্রাসের। ছেক গোণ। শ্রুত্যানুপ্রাসকে আমরা গ্রহণ করছি শুধু অন্ত্যানুপ্রাসের সহকারিরূপে; বাঙলায় এর স্বতন্ত্র আসন নাই।

(ক) শ্রুত্যানুপ্রাস §

বাগ্যন্তের একই স্থান হ'তে উচ্চারিত শ্রুতিগ্রাহ-সাদৃশ্যময় ব্যঞ্জনধ্বনির নাম শ্রুত্যানুপ্রাস।

ধ্বনির ঐক্য নয়, সাদৃশ্য অর্থাৎ 'ছন্দ-নন্দ'-র মতন ঠিক এক নয়, 'ছন্দ-বন্দ'-র মতন একরকম। বাঙলায় 'ক' আর 'খ' সদৃশ ধ্বনি, 'গ' আর 'ঘ' সদৃশ ধ্বনি; তেমনি চ ছ, ট ঠ, ত থ, প ফ, জ ঝ, ড ঢ, দ ধ, ব ভ সদৃশ ধ্বনি। এইজাতীয় ধ্বনিসাদৃশ্য নিয়ে অজস্র অন্ত্যানুপ্রাস সৃষ্টি করেছেন বাঙলার সকল যুগের কবিরা। রবীন্দ্রনাথ থেকে উদাহরণ দিই—

ক খ : পরপারে দেখি আঁকা তরুছায়া মসীমাখা।

গ ঘ : বাতাস বহে বেগে, ঝিলিক মারে মেঘে।

চ ছ : কালো চোখে আলো নাচে, আমার যেমন আছে।

জ ঝ : চিরদিন বাজে অন্তরমাঝে।

ট ঠ : ধরি তার কর ছুটি, আদেশ পাইলে উঠি।

ত থ : লীলাপদ্ম হাতে, কুরুবক মাথে।

দ ধ : বাদী প্রতিবাদী, বিবিধ উপাধি।

প ফ : দিল সে এত কাল ষাপি, হোলির দিনে কত কাফি।

ব ভ : কুল নাহি পাই তল পাব তো তবু ;

হতাশ মনে রইব না আর কভু।

('ড-ঢ'-র অন্ত্যানুপ্রাস বাঙলায় নানা কারণে হ্রস্ব)

উপরের প্রত্যেকটি উদাহরণে একস্থান হ'তে উচ্চারিত শ্রুতিগ্রাহ সদৃশ ধ্বনি ব্যঞ্জনের অনুপ্রাস, অতএব শ্রুত্যানুপ্রাস। উদাহরণগুলি